

# 7 Te whakaterere waka Te whakamānu i tōku waka

## Mahere wātū

### Ngā karere matua

- Kei te mōhio ahau he pūmanawa tōku mō tētahi aramahi.
- Kei te mōhio au ki ētahi mahi ka mahia e au ināianei kia takatū ai au mō taku aramahi kei tua.

### Te raupapa wātū

1. Kiia atu ki ngā rangatahi ka oti i a rātou i tēnei wātū tā rātou pūwhakamahere aramahi Te haerenga hou, ā, ko tōna tikanga kei te whakamānu rātou i tō rātou waka hei hoenga atu mā rātou ki tō rātou aramahi ki tua.
2. Whakarāpopotohia ia wāhanga o te pūwhakamahere aramahi Te haerenga hou me te whakapakari i ngā ariā matua kei ia wāhanga:
  - **Te kaihoe** – Ko koe te kaihoe e hoe ana i tō waka i tōu anō haerenga, engari ehara ko koe anō kei taua haerenga, e haere tahi ana tō ahurea, tō whakapapa me te whānau hei hoa haere.
  - **Te waka** – I tō haerenga kei reira te huhua o ngā tāngata e hiahia ana ki te hāpai i tō angitu. Tautohua aua tāngata me te whakarite kei te mōhio rātou ki te aronga e hiahia ana koe ki te whai nā te mea mā rātou koe e āwhina kia ū pai ki tō ūnga.
  - **Te hoe** – Kei a koe te tikanga kōwhiri i te ahunga hei whāinga māu. Kia āta takatū mō tō haerenga mā te kaiaka haere ki ō pūkenga hou, mā te noho tuwhera ki ngā arawātea hou, mā te tīpako marau me ngā akoranga ka āta tau ki te ahunga aramahi ka whāia e koe.
  - **Tangaroa** – Āe rā, ka tūpono ngā wero, heoi anō mā aua wero anō e tohu te ara tika hei whāinga māu. Kaua e matakū ki te tono āwhina.
3. Tonoa ngā rangatahi kia whakaoti i te wāhanga Tangaroa o tā rātou pūwhakamahere aramahi Te haerenga hou. Hei takirua, tonoa rāua kia kōrero ā rāua mahere me te tautuhi wāhi hei whakaarotanga tonutanga mā rāua, me te tuku i ngā pātai kei a rāua. Ehara i te mea me mōhio pū ngā rangatahi i tēnei wā ki tā rātou e hiahia ai ki te ako, ki te mahi rānei e hiahia ana rāua kia mahia. Kōrerotia kei te atinga rātou o tētahi haerenga, ā, he rawaka te mahere kei a rātou i tēnei wā hei tīmatanga pai mō taua haerenga ki tō rātou aramahi ā muri atu.
4. Whakatauria he tukanga hei whaiwhai ake i ngā mahere aramahi a ngā rangatahi. Kohia ērā, ka tārua rānei mō ngā wātū whai ake, hei whakamahinga ā-rōpū, takitahi rānei. Whakamihia rātou mō te whakaoti i ā rātou mahere aramahi me te kī atu, kua tīmata pai tō rātou haerenga aramahi, ā, ko tōna hua ko tētahi whakarerenga pai ki ā rātou anō uri whakaheke.

### Ngā āheinga aramahi matua

Te whakawhanake pūkenga hanga me te mau ki tō rātou ata takatika ā-hinengaro mō rātou anō.

Whakaatu māramatanga ki ngā mahi whakamahere aramahi paetata me te paetawhiti.

### Ngā pātai matua

He pēhea ki a koe ināianei tō tūnga hei kaihoe i tōu anō waka aramahi?

Me kimi mōhiohio atu anō koe mō ēhea atu mea?

He aha te mahi whai ake māu i tō haerenga aramahi?

### Ngā rauemi tautoko

Kaiārahi PowerPoint 7

Ngohe rangatahi:  
Pūwhakamahere aramahi  
Te haerenga hou (Wātū 1)

### Roanga

20-30 meneti